



Sesida dals

Communitgà ils

Protocol nr.

3 da favrer 2026

4 da favrer 2026

58/2026

Dumonda Spagnolatti

concernent in rinforzament dal sustegn finanziel per las puras ed ils purs sin las alps
ed en ils manaschis areguard las mesiras per la protecziun da muntaneras e la
pasculaziun

Resposta da la Regenza

La Confederaziun ed ils chantuns finanzieschan cuminaivlamain mesiras per la protecziun da muntaneras. En l'Ordinaziun davart la chatscha e la protecziun dals mamifers e dals utschels selvadis (OChP; CS 922.01) fixescha la Confederaziun las mesiras per la protecziun da muntaneras, ch'ella sustegna sco er l'autezza da sias contribuziuns als custs dals chantuns.

Las contribuziuns federalas als custs dals chantuns per mesiras reconuschidas importavan per regla 80 pertschient. Al chantun restavan uschia 20 pertschient dals custs. La finanziaziun d'ulteriuras mesiras stueva il chantun da princip reglar sez. A tschertas mesiras chantunalas sa participava dentant er la Confederaziun cun contribuziuns da fin 50 pertschient, sco per exempel en il sector dal Program chantunal da chauns da protecziun da muntaneras, ch'è vegnì lantschà l'onn 2021. A partir da l'onn 2022 ha la Confederaziun extendì las mesiras per la protecziun da muntaneras ch'ella subvenziunava, ed ha mess a disposiziun meds finansials supplementars. Da nov èn uschia vegnidas pajadas contribuziuns al material d'agid tecnic per survegliar las muntaneras e per observar ils animals da rapina gronds, ad alloschis mobils sco er al persunal auxiliar supplementar en la protecziun da muntaneras. La Confederaziun ha vinavant surpiglià 80 pertschient dals custs, il chantun il rest. Ultra da quai ha il chantun surpiglià ils custs restants da las mesiras che surpassavan la limita superiura fixada da la Confederaziun. Plinavant ha il chantun pajà individualmain contribuziuns a mesiras che la Confederaziun n'aveva betg reconuschì sco subvenziunablas (sco guardias da lufs surregionalas). Per l'alpegiada 2024 èn las mesiras per la protecziun da muntaneras vegnidas adattadas levamain. Perquai ch'ina contribuziun supplementara è vegnida introducida tar ils pajaments directs a l'agricultura, ha la Confederaziun stritgà il sustegn per il persunal auxiliar tar la protecziun da muntaneras. Il chantun ha dentant serrà la largia ed ha surpiglià quests custs.

Il favrer 2025 è entrada en vigur ina revisiun da la OChP. Las mesiras per la protecziun da muntaneras èn vegnidas definidas da nov, fertant che la Confederaziun ha sorprendentamain reducì sia participaziun a 50 pertschient dals custs da la mesira

respectiva. Sin quai ha il chantun reglà da nov la finanziaziun en il sector da la protecziun da muntaneras cun chauns per ils onns 2025 fin 2028, ed adattà la finanziaziun en il sector da las ulteriuras mesiras per la protecziun da muntaneras per l'onn 2025. El ha surpiglià 50 pertschient dals custs per la locaziun e per il transport d'alloschis mobils, per perditas da la racolta sco er per saivs da protecziun da muntaneras sin manaschis d'alpegiada. Per saivs sin manaschis da chasa ha el surpiglià 25 pertschient. Per il persunal auxiliar ch'è exclus dal sustegn federal, ha el surpiglià 40 u 60 pertschient dals custs (tut tenor la grondezza dal manaschi d'alp). Las guardias da lufs ha la Confederaziun renconuschì sco mesira d'urgenza pir posteriuramain ed è lura sa participada cun 50 pertschient al sustegn chantunal. Il sector dals chauns da protecziun da muntaneras ha stuì vegnir reglà cumplettamain da nov, perquai che la Confederaziun è sa retratga da grondas parts da quel. Silsuenter ha la Regenza deliberà in nov Program per promover chauns da protecziun da muntaneras per ils onns 2025–2028.

Sin basa d'ina intervenziun parlamentara ha la Confederaziun puspè stuì auzar sias contribuziuns sin 80 pertschient. Las mesiras sco talas n'èn da princip betg vegnidas adattadas. Las chargias dal chantun vegnan tras quai puspè reducidas a partir da l'onn 2026. Sin basa da las duas ultimas revisiuns da la OChP dals onns 2025 e 2026 e sin basa dal fatg, che las pretensiuns dal chantun èn uschia ademplidas per gronda part, n'èsi betg da quintar cun ulteriuras adattaziuns da la OChP. Il chantun paja pia er vinavant individualmain contribuziuns a tschertas mesiras.

Tar la dumonda 1: In ulteriur rinforzament dal sustegn tant areguard pasturas e pasturs sco er en general en la protecziun da muntaneras n'è actualmain betg previs. L'indemnisaziun prevista da la lavur supplementara sco er ils credits federals attribuids duessan bastar. In sustegn supplementar tras la Confederaziun è improbabel. I n'è dentant betg exclus, ch'il chantun examineschia – sche necessari – in sustegn pli intensiv u promovia ulteriuras mesiras. El giuditgescha la situaziun adina puspè da nov.

Tar la dumonda 2: Guardar resposta a la dumonda 1.

Tar la dumonda 3: La stimaziun da la necessitad e dal basegn da mesiras e da meds finansials en il sector da la protecziun da muntaneras è ina incumbensa permanenta. En quest regard è il chantun er en contact cun la Confederaziun.



En num da la Regenza

Il president:

Martin Bühler

Il chancelier:

Daniel Spadin